

CONGREGATIO DE CAUSIS SANCTORUM

MATRITENSIS

BEATIFICATIONIS et CANONIZATIONIS

SERVI DEI

IACOBI MASARNAU FERNANDEZ

CHRISTIFIDELIS LAICI

(1805-1882)

DECRETUM SUPER VIRTUTIBUS

“Beatus, qui intellegit de egeno: Dominus beatum faciet eum in terra” (Ps 41,2.3).

Servus Dei Iacobus Masarnau Fernandez, qualis eminens socius Societatis Sancti Vincentii a Paulo, caritate operosa ut sanctus fieret incitatus est. Beatus Fridericus Ozanam, Societatem instituens, pro sociis eius hoc ipsum quidem cupiverat.

Servus Dei Matriti die 10 mensis Decembris anno 1805 ortus est. Una cum familia sua in plurimis Hispanicis oppidis habitavit dein, cum pater eius praecipua in Regis Domo officia sumeret,

Matritum rediit. Iam a pueritia se musicae aptum esse ostendit et adulescentiae tempore mathematicae studia inchoavit. Ad musicam institutionem complendam Lutetiam petivit. Lutetiae Londinique vixit, ubi professionis, societatis culturaeque stimulos invenit. Fidem catholicam exercebat, at dicis causa tantum.

Anno 1938 quoddam acre animi discrimen ad Confessionem Generalem adduxit eum, cuius fidei studium, Communionem suscepta, funditus mutavit. Conferentias Sancti Vincentii a Paulo ingressus est et fiducia in Providentia veracique caritate erga pauperes statim eminuit. Spiritualem vitam curavit, videlicet cotidie Missae intererat, assidue precabatur Sacramque Scripturam legebatur.

Matritum rediit ad musicam docendam. Suum caritatis ministerium tacite in valetudinariis, hospitiiis aliisque institutis perrexit. Personans quoque musicamve gratuito docens, solacium multis afferebat. Sanctam Mariam Michaëlam a Sanctissimo Sacramento Desmaysières ad operam pro exclusis mulieribus fundendam auxilio laboris adiuvit. Anno 1849, una cum duobus in eius eodem collegio docentibus, primam Hispanicam Conferentiam Sancti Vincentii a Paulo instituit. Ipse sociorum formationem curabat. Rei publicae commutatione exarsa, Societas diducta est at Servus Dei clam caritatis opere non desiit et circiter centum familias singulis hebdomadis visitabat. Regno Bourbonio restaurato, Servus Dei operam dedit ut Societas denuo ordinaretur, cuius praesidis munere ad annum 1882 functus est.

Servi Dei fidei fervor non tantum vitam eius continenter animavit, sed et multorum caritatem in Deum excitavit, tam ut exemplo suo et plurimas ad vitam consecratam vocationes foveret.

Eucharistiam, Virginem Mariam, Sanctos, Sanctum Ioseph Sanctumque Vincentium a Paulo in primis, diligebat. Ecclesiae Summoque Pontifici oboedientiam praestabat. Non modo societatis reique publicae Hispanicae illius temporis vicibus, sed ut Societatis Sancti Vincentii a Paulo apostolatus bene videretur ac reciperetur quoque, valde laboravit. Adversas inter res spem suam et fortitudinem, necnon perseverantiam in bono prudentiamque suam testificatus est. Summa caritate pauperes auscultabat eorumque unumquemque nomine noscebat, et familias eorum adiuvabat. Sic re, zelo suo ac sedulitate, Deum indigentibus adesse nuntiabat.

Aetate defessus atque “labore caritatis” (1Thess 1,3) fatigatus, Superiori Consilio se Societatis regimen abdicare certo renuntiavit. Valetudo eius in peius mutavit, tam ut mori se apparere suaderetur. Caritatem usque ad finem exercens, obiit. Dies fuit 14 mensis Decembris anno 1882. Multitudo, quae exequiis eius interfuit, sanctitatis famam, qua in vita iam circumdatus erat, patefecit.

Hac perdurante increbrescenteque fama, Servi Dei Causa beatificationis et canonizationis est instructa. Iuxta Curiam ecclesiasticam Matritensem die 5 mensis Iunii anno 1999 Inquisitio Diocesana inchoata est, quae die 14 mensis Decembris anno 2000 est clausa, cuiusque de iuridica validitatem haec Congregatio de Causis Sanctorum die 8 mensis Novembris anno 2002 decretum edidit. Exarata est inde Positio, quae die 30 mensis Octobris anno 2007 Consultorum Historicorum iudicio est subiecta. Inde, consuetas secundum normas, an Servus Dei virtutes christianas heroico in gradu excoluisset disceptatum est. Die 7 mensis Novembris anno 2019 Peculiaris Consultorum Theologorum Congressus, fausto cum

exitu, habitus est. Die 19 mensis Ianuarii anno 2021 Patres Cardinales et Episcopi, Ordinaria in Sessione congregati, Servum Dei theologales, cardinales iisque adnexas virtutes heorum in modum exercuisse professi sunt.

Facta demum de hisce omnibus rebus Summo Pontifici Francisco per subscriptum Cardinalem Praefectum accurata relatione, Sanctitas Sua, vota Congregationis de Causis Sanctorum excipiens rataque habens, hodierno die declaravit: *Constare de virtutibus theologalibus Fide, Spe et Caritate tum in Deum tum in proximum, necnon de cardinalibus Prudentia, Iustitia, Fortitudine et Temperantia iisque adnexis in gradu heroico Servi Dei Iacobi Masarnau Fernandez, Christifidelis Laici, in casu et ad effectum de quo agitur.*

Hoc autem decretum publici iuris fieri et in acta Congregationis de Causis Sanctorum Summus Pontifex referri mandavit.

Datum Romae, die 21 mensis Ianuarii a.D. 2021.



A handwritten signature in blue ink, which appears to read 'Marcello Semeraro', is written over the seal.

MARCELLUS Card. SEMERARO
Praefectus

A handwritten signature in blue ink, which appears to read 'Fabius Fabene', is written below the first signature.

+ FABIUS FABENE
Archiep. tit. Faliscodunensis
a Secretis